

In vergeblich kommen were/oder wurde/der oder derselben mögen sich zum Schultheissen verfügen/der halben bey ihm zu erkündigē/vnd bericht zu nemen/welchen er ihnen ihrem begeren nach/also zu thun vnd zu geben schuldig seyn soll.

Diese Artickel sollen dem Kriegsvolck mit ernstem fleiß vorgehalten werden/dan sie sindt das Gericht/die Straff vnd Schwert/darzu welcher nicht gehalten/sondern vergessen vnd verbroschen wirdt/dem gehts an den Hals/nach erkennnis.

Weiter also lieben Kriegsleut/ihr habet nun den Artickels brieff verstanden/vnd lesent/vernommen/vnd auch des Herren Wehre bekommen/defgleichen Lauffgelt/vnd der Haus leut Kost bis anhero empfangen/vnd noch nicht gemunstert worden/so sendt ihr dem Feldherren vnd seinem Obersten vnd Hauptleuten schuldig/einen Eydt zu thun/vnd zu dem Feindlin schweren/das wir vns wollen gebrauchen lassen/mit Leib vnd Leben/Gut vnd Blut/so lange vnser leben weret/oder mit ehren vom herren abgedanckt werden/wie ich euch jekundt vorsagen oder lesen wil/derhalben so recke ein jeder mit mir zwen Finger in seiner rechte Handt auff vnd spreche mir nach/also:

Wir geloben vñ schweren/ bey vnserm höchstem Eydt vnd pflichten/so wir Gott dem Almechtigen im Himmel/vnd vnserm gnedigsten Herrn zu thun/schuldig seyn/Das wir wollen dem Durchleuchtigsten vnd Hochgebornen Fürsten etc. seiner Churf. Gn. vnd auch ihrer Churf. Gn. Feldeobersten/oder Hauptleuten folgen wollen/anff Züg vnd Wacht/vor vnd von dem Feinde/in Stürmen/Schlachten/Scharmüßeln/wie vnd wo der Herr vnser begeret/es sey bey tag oder nacht/mit halbem oder ganzem Fenlein/in ganker vnd halber Rotte/in Wasser vnd Lande/in Besatzung oder in Felde/so wollen wir das gute schutzen/vnd dem bösen widerstehen helffen/vnd vns wider alle Feinde/vnd so ihrer Churf. Gn. zu wider seyn/in streiten/vnd als redliche Kriegsleut gebrauchen lassen/weil wir das Leben/vnd eine Hand voll Blut im Leibe habē/so wahr vns Gott helffe/vnd sein heiliges Wort vnd Euangelium/

Das helffe vns Gott.

Amen.

